

Morning Regional Dogri News Bulletin, 12th June 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. जम्मू खित्ते च दऊं होर आतंकवादी हमले होईं गे न। हीरानगर च होए दे टाकरे च इक आतंकवादी मारेआ गेआ ऐ। ताजा गोलीबारी च सीआरपीएफ दा इक जवान शहीद, डोडा दे छतरगल्ला च आतंकवादिएं सुरक्षाबलें पर गोलियां चलाइयै हमला कीता ऐ।
2. रियासी पुलस नै यात्रुएं दी बस पर होए दे हमले च शामिल आतंकवादिएं बारे जानकारी देने आले गी 20 लक्ख रपे दा इनाम दी घोषणा कीती ऐ। पुलस नै आतंकवादी दा स्कैच बी जारी कीता ऐ।
3. सेना दे उपाध्यक्ष लैफ्टिनेंट जनरल उपेन्द्र द्विवेदी होरें गी फौज दा अगला प्रमुख नियुक्त कीता गेआ ऐ।
4. जम्मू थमां माता वैष्णो देवी भवन लेई हैलीकाप्टर सेवा 18 जून कोला शुरू होआ करदी ऐ।

<><><><><><>

Terror Incidents

रियासी च होए दे आतंकवादी हमले दे दऊं दिनें मगरा दो होर आतंकवादी हमले होईं गे न। कठुआ जिले दे हीरानगर ते डोडा जिले दे छतरगल्ला च आतंकवादिएं हमला कीता ऐ। कठुआ दे हीरानगर च कल संजा इक रिहायशी मकान च दाखल होए दे आतंकवादिएं कन्नै होए दे टाकरे च सीआरपीएफ दा इक जवान शहीद होईं गेआ ते इक आतंकवादी मारेआ गेआ ऐ। अधिकारिं मताबक बडलै 3 बजे टाकरे आली थाहर नमें सिरैया गोलीबारी होईं जेह्दे च सीआरपीएफ दा इक जवान घायल होईं गेआ जिसी हीरानगर दे उप-जिला अस्पताल च लेता गेआ, उआं इलाज दरान ओह्दी मौत होईं गई। पुलस दे जम्मू जोन दे अतिरिक्त महानिदेशक आनंद जैन होरें हीरानगर च पत्रकारें गी दस्सेआ जे जंदी संजा कठुआ जिले दी हीरानगर तैहसील च कूटा मोड़ कोल सैडा सुखहल ग्रां च दऊं आतंकवादी दिक्खे गे। इक आतंकवादी नै ग्रनेड सुट्टने दी कोशश कीती ते गोलीबारी च मारेआ गेआ, दुआ आतंकवादी इलाके च छप्पी गेआ। पुलस दे अधिकारी होरें दस्सेआ जे एह घुसपैठ दी ताजा कोशश ऐ ते पाकिस्तान इलाके च अमन-शांति आले माहौल च खोद्धल पाना चांहदा ऐ। छतरगल्ला टाकरे पर जैन होरें आखेआ जे जंदी रातीं 4 राश्ट्रीय राइफलज ते पुलस दे सांझे नाके पर

आतंकवादिएं गोलियां चलाई दित्तियां ते सुरक्षाबलें जवाबी कारवाई कीती। टाकरा चला करदा ऐ उआं तुरत कोई जानकारी उपलब्ध नेई ऐ की जे एह इलाका बड़ा दूर-दरेड़ा ऐ। इस टाकरे च इक जां दऊं आतंकवादी घायल होई गेदे न उआं कोई अधिकारिक तस्दीक नेई कीती गेदी ऐ।

<><><><><><>

SSP Samba Situation

कठुआ जिल दे रौडा ग्रां च होए दे आतंकवादी हमले गी दिक्खदे होई पूरे जिले च मती चौकसी आले हाई अलर्ट दी घोषणा कीती गई ऐ। कठुआ जिले कन्नै लगदे सांबा जिले दे इलाके च बी तपाशी अभियान चला करदा ऐ। सांबा दे एसएसपी विनय शर्मा होरें साढ़े जिला संवाददाता सतपाल शर्मा होरें गी फोन पर दस्सेआ जे कठुआ जिले कन्नै लगदे जंगली इलाकें, नालें ते सब्बने रस्ते पर घेरा पाई लैता गेआ ऐ ते तपाश आली कारवाई चला करदी ऐ।

<><><><><><>

Reasi Reward

रियासी पुलस नै रियासी जिले दे पौनी इलाके च यात्रिएं दी बस पर होए दे हमले च शामिल आतंकवादिएं बारे जानकारी देने आले गी 20 लक्ख रपे दा इनाम देने दी घोषणा कीती ऐ। आकाशवाणी जम्मू संवाददाता दी रिपोर्ट मूजब चश्मदीये थमां थहोई दी जानकारी दे आधार पर आतंकवादिएं दे स्कैच जारी कीते न। रियासील पुलस नै आम लोकें थमां अपील कीती ऐ जे ओह इस सरबंधे च कोई बी पुख्ता जानकारी अधिकारिएं गी बक्ख-बक्ख नंबरें पर दित्ती जाई सकदी ऐ, नंबर नः-

9205571332, 9419113159, 9419133499, 7051003214, 7051003213 ते 9622856295 ।

<><><><><><>

Army Chief

लैफ्टिनेंट जनरल उपेन्द्र द्विवेदी होरें गी अपना थल सेना अध्यक्ष नियुक्त कीता गेआ ऐ। ओह इस म्हीने दी 30 तरीक गी अपना औहदा सांभगन। मजूदा सेनाध्यक्ष जनरल मनोज पांडे होर 30 जून गी रटैर होआ करदे न। लैफ्टिनेंट जनरल द्विवेदी होरें गी परम विशिष्ट सेवा मैडल, अति विशिष्ट सेवा मैडल कन्नै सम्मानत कीता जाई चुके दा ऐ। ओह इसले सेना दे उपाध्यक्ष दे तौर पर अपनियां सेवा देआ'रदे न। पैहली जुलाई 1964 गी पैदा होए दे जनरल उपेन्द्र द्विवेदी 15 दिसम्बर 1984 गी भारतीय फौज दी इन्फेंट्री, जम्मू कश्मीर राइफलज च शामिल होए हे। उनें कोई 40 ब'रें दे लम्मे सेवा काल च बक्ख-बक्ख औहदे पर अपनियां सेवा दित्ती दियां न।

लैफ्टिनेंट जनरल द्विवेदी 2022 कोला लेइयै 2024 तगर इन्फेंट्री दे महानिदेशक ते उत्तरी कमान मुख्यालय दे जीओसी समेत होई केई महत्वपूर्ण औहदें पर रेही चुके दे न।

<><><><><><>

CS-Handicrafts

मुख्य सचिव अटल डुल्लू होरें कल जम्मू कश्मीर च हथखड्डी ते लौहके, भलेआं लौहके ते दरमेयाने दर्जे दे उद्यमें गी बड्डे पैमाने पर बढ़ावा देने लेई अगूं दी योजनाएं दा जायजा लैता। विश्व बैंक दे साथ-सैहयोग कन्नै इनें उद्यमें गी बढ़ावा देने दी योजना ऐ। उनें इस बारे मुत्तलका मैहकमे आस्सेआ तैआर कीते गोदे प्रस्तावें दा ब्योरेवार जायजा लैता। उनें इस बड्डी योजना दे मसौदे गी तैआर करने च मुत्तलका अधिकारिणं आस्सेआ कीते गोदे कम्में दी तरीफ कीती। इनें मसौदें गी बचार करने लेई विश्व बैंक अगुै पेश कीता जाना ऐ।

<><><><><><>

Vaishno Devi

जम्मू थमां रियासी जिले दी त्रिकुटा पहाड़िणं च स्थित माता वैष्णो देवी जी दे मंदर तगर औने जाने आस्तै 18 जून थमां हैलीकाप्टर सेवा शुरू होग। एह गैह जीर्थयात्रा गी बवस्था आली सुविधा जनक बनाने ते दुनिया भरै थमां गुफा च माता दे दर्शन करने ते उत्थें मत्था टेकने आस्तै औने आले श्रद्धालुएं गी बेहतर सुविधा हासल करोआने दे लगातार जतन तैहत पुट्टी गई ऐ। श्री माता वैष्णो अस्थापन बोर्ड दे मुख्य कारजकारी अधिकारी अंशुल गर्ग होरें आखेआ जे होर दुइयां सुविधा बैटरी कार सेवा, पैहल दे आधार पर दर्शन, प्रसाद ते रोपवे सनें होर दुइयां सुविधां दित्तियां जांगन। श्रद्धालुएं लेई दो चाल्ली दे पैकेज उपलब्ध न, इक पर 35 जहार रपे फही श्रद्धालु खर्चा औग ते दुए च 60 जहार फही श्रद्धालु खर्चा औग। गौरतलब ऐ जे इसलै हैलीकाप्टर सेवा कटरा ते सांझीछत्त बश्कार गै उपलब्ध ऐ।

<><><><><><>

Amarnath Yatra

ग्रामीण विकास ते पंचैती राज मैहकमे दे सचिव शाहिद इकबाल चौधरी होरें बालटाल आधार शिविर, दोमेल नीलग्रंथ दा दौरा लाया ते औंदी श्री अमरनाथ जी दी यात्रा दे सरबंधे च कीती जा'रदी तैआरिणं ते साफ सफाई सरबंधी कम्में दा जायजा लैता। इस ब'रे आली एह सलाना यात्रा 29 जून गी शुरू होआ'रदी ऐ। डॉ. शाहिद इकबाल चौधरी होरें बक्ख-बक्ख साफ सफाई सरबंधी ढांचे, शौचालय, कूड़ा दान, गंदे पानी दी निकासी, गीते ते सुक्के कचरे गी बक्ख करना, प्लास्टिक दे कचरे दा प्रबंधन ते होरने सरबंधी कम्में दा जायजा लैता। ताई

सांबा दे डिप्टी कमीशनर अभिषेक शर्मा, कठुआ दे डिप्टी कमीशनर राकेश मिन्हास होरें सरबंधी बक्ख-बक्ख मैहकमे कन्नै बैठक लाई ते श्री अमरनाथ जी दी यात्रा गी सुचारू ढंगै सिर करोआने लेई कीते जा'रदे इंतजामें दा जायजा लैता।

<><><><><><>

National Highway

राजौरी दे जिला विकास आयुक्त ओ.पी.भगत होरें इक बैठक लाइयै राष्ट्रीय जरनैली शिड़कै पर चला'रदे कम्में दी प्रगति ते राजौरी-थन्नामंडी-सुरनकोट शिड़क परियोजना दे कम्मै दा जायजा लैता। दौनें शिड़कें दे कम्में गी सुचारू ढंगै सिर करोआने लेई सारी रूकावटें गी दूर करने पर मुख् करी ध्यान दित्ता गोआ। अटी ग्रं आले मामले करी राजौरी थन्नामंडी सुरनकोट शिड़क परियोजना दे कम्में च बिघ्न पवा'रदा ऐ। इस पर बैठक दरान व्यापक बचार बमर्श होआ। भगत होरें मुत्तलका प्रशासन गी हिदायत कीती जे ओह मामले दा पैहल दी बिनाह पर हल्ल करन।

<><><><><><>

GHSS Water

डोडा च सरकारी हायर सकेंडरी स्कूल बेरारू दे इको क्लब दे स्वयं सेवकें समर कैंप दे 6में ध्याड़े विद्यार्थिएं च पानी दी सांभ-सम्माल दी भावना पैदा करने बारे ते जागरूकता लेई केई सारी गतिविधिएं दा आयोजन कीता। इस प्रोग्राम दा विषयसार हा "सेव वाटर" यानि पानी बचाओ। एहदा मकसद लोकें च पर्यावरण गी लेइयै जिम्मेदारी दी भावना कायम करना हा। इंदे च नलके थमां पानी लीक होने दी जांच करने, पोस्टर बनाने, भाषण देने ते बक्ख-बक्ख स्रोतें थमां पीने आले पानी दी गुणवत्ता दी जांच करने सरबंधी गतिविधियां शामिल हियां।

<><><><><><>

IMD

मौसम विभाग नै अगले 4 दिनें दरान जम्मू खित्ते, हिमाचल प्रदेश, उत्तराखंड, मध्यप्रदेश, हरियाणा ते दिल्ली च बड़ी मती गर्मी पौने सरबंधी ऑरेंज अलर्ट जारी कीता ऐ। मानसून बारे गल्ल करदे होई मौसम विभाग दा गलाना ऐ जे अगले इक दिन च दक्खन-पच्छम मानसून दे तेलंगाना ते छत्तीसगढ़ च अग्गे बघने आस्तै माहौल साजगार ऐ।

<><><><><><>